

TORITENY - ALAHADY KAREMY 3 - TAONA A



MAHATOKY ANDRIAMANITRA

Ry Kristianina havana, manomboka amin'izao Alahady fahatelon'ny karemy izao dia ny Evanjely nosoratan'I Md Joany no vakintsika isan'Alahady fa indrindra ireo Evanjely izay famantarana mifandray akaiky amin'ny batemy. Handinika bebe kokoa isika ny batemy fandalovana, miala amin'ny fahafatesana miditra amin'ny fiainana ka ny Alahady fahatelo sy fahaefatra ary fahadimy dia handinika ireo famantarana ao amin'ny Evanjelin'I Md Joany isika sady misy fanazavana ataon'i **Jesoa** mikasika **ireo** famantarana **ireo**. Ny Alahady fahatelo izao dia famantarana mikasika ny rano, izany hoe ny fihaonan'i Jesoa tamin'ilay vehivay **Samaritana**, mangetaheata tokoa isika, mangetaheta famonjena nentin'i kristy. **Ary** ho hitantsika **aman'**ireo famantarana ireo hatramin'ny Alahady fahadimy ny karemy fa miara-belona amintsika tokoa i Jesoa ka manala an'izay rehetra mandrakotra ny fiainantsika, mitondra atsika amin'ny tena fiainana ka anjarantsika no mandray azy. Raha mandray azy isika dia mahazo fahasoavana ary feno hafaliana. Ny hahafantarana fa nandray fahasoavana isika dia tsy mitana samirery ho ansika **ny hafaliana vokatry ny fahsaovana** fa manambara **azy** amin'ny manodidina. Matetika isika tsy mahafantatra ka manontany raha tena votom-pinoana isika ?

Vakiteny I : Eks. 17, 3-7
Tononkira : Sal. 94,
Vakiteny II : Rôm. 5, 1-2, 5-8
Evanjely : Jo. 4, 5-42

Raha isika mandray sy manome dia manambara izany finoana izany amin'ny alalan'ny fahafoizana, fanompoana, faharetana satria izany ny vaovao mahafaly nentin'i Kristy.

Ny tenin'Andriamanitra arosan'ny Eglizy amin'izao Alahady fahatelo izao dia manambara fa efa manakaiky ny fiakarana eny antendrombohitra isika. Isika eto Antsiranana moa dia ny fanaovana ny pelerinajy eny amin'ny "montagne de francais" izay hibanjinantsika an'i Jesoa mpiara-belona amintsika ka hiakatra eny antendrombohitra, ka hiova fo tokoa isika ho zary "chappelle" velona tokoa eo anivon'ny tanànantsika ka hizara ny fahasoavana isika eo anivon'ny fiaraha-monina.

Mangetaheta ny famindrampon'Andriamanitra izao andro iainantsika izao, izany no voalaza ao amin'ny vakiteny voalohany "*Tamin'izany andro izany dia, main'ny hetaheta ny vahoaka, ka nimonomonona tamin'i Môizy nanao hoe: "Ahoana no nampiakaranao anay hiala tany Ejipta, hahafatin'ny hetaheta anay sy ny zanakay mbamin'ny bibinay?"*

Mitranga amin'ny fiainantsika ankehitriny koa izany, rehefa tojo zavatra manahirana isika dia mitady hanome tsiny an'Andriamanitra, mahatoky anefa izy **fa** tsy mivadika amin'ny dinam-pitiavany **Andriamanitra**. Raha nimonomonona ny vahoaka dia nomen'Andriamanitra rano velona ary tandindon'i Jesoa **io** rano velona **io**, **Izy** ilay rano mamelona atsika amin'ny Paka, ilay hanaovana batemy atsika ka hazahoantsika ilay ain'Andriamanitra." *Fa indro Aho hitsangana eo anoloanao ao amin'ny vatolampy izay any Hôreba; hikapoka ny vatolampy ianao; dia hivoaka ny rano ary hisotro ny vahoaka*".

Io ny tantaran'I Masa sy Meriba izay nolazaina fa naka fanahy ny Tompo Andriamanitra nefa eo afovoan'izy **ireo** tokoa ny Tompo "*Nataon'i Môizy teo anatrehan'ny loholon'i Israely izany, ary nomeny anarana hoe: Masah sy Meribah io fitoerana io, fa nila akisa ny zanak'i Israely, sy naka fanahy ny Tompo nanao hoe: "Eto afovoantsika va ny Tompo sa tsia?"*

Anjarantsika izany no misafidy : hahita ny Tompo eo amin'ny fiainantsika, izany no lazain'i Md Paoly ao amin'ny vakiteny faharoa (Rôm. 5, 1-2, 5-8) efa eo amintsika tokoa ny fanahin'Andriamanitra satria niaraka amin'izany dia nomena atsika ny fitiavana, io no rano velona mamelona ny fiainantsika. Raha lavitra ny fitiavana dia maty ny fiainantsika. Hitantsika izany eo amin'ny korontana maro isankarazany eran'izao tontolo izao, eo amin'ny fiainantsika andavanandro, eo amin'ny fianakaviansika. Raiso ary ny fanahy masina, araraoty izao vanimpotoan'ny karemy izao mba hihavaozantsika tokoa, mihavana re amin'Andriamanitra, raha mihavana aminy isika dia karakarainy isika , I Jesoa mpiara-belona amintsika, raiso ny sakramentan'ny famindrampon'Andriamanitra, araraoty izao fotoana izao dia hiova ny fontsika ka hitoetra eo amin'ny fiainantsika tokoa ny fitiavan'Andriamanitra. Miaraka amin'ny fitiavan'Andriamanitra ny fanantenana, tsy mba manodoka na mamitaka ny fanantenana, raha ao amintsika tokoa ny fitiavan'Andriamanitra dia tsy ao amintsika ny ratsy, tsy hifamono isika fa hifanao soa ka hikatsaka ny soa iombonana.

Io no azo amintinana ny Evanjely mitantara ny fihaonan'i JESOA tamin'ny vehivavy samaritana, vizana I Jesoa ka nanatona ilay vovo fantsakana rano tao amin'ny tanànan'ny Sikara. Matoa I Md Joany namaritra ny ora sy ny toerana dia misy dikan'ny lehibe io **fihaonan'i** Jesoa tamin'ilay vehivavy samaritana io, izay nanambarany ny momba azy fa izy Jesoa no rano velona, izy no mesia. Azo lazaina fa fandalinampinoana no ataon'i Jesoa eto, taritiny tsikelikely ilay vehivavy mba hahatsapa fa izy tokoa no tena famonjena.

Izay no ataon'i Jesoa amintsika isaky ny mamaky baiboly isika, "inty ny zanako malalako henoy izy". Isaky ny mihaino ny tenin'i Jesoa isika dia mampianatra izy, raha mba "fantatrao manko ny fanomezan'Andriamnatira ?" raha mba fantatsika izany fanomezana izany dia isika no hihazakazaka hanatona an'i Jesoa, izany no nataon'ilay vehivavy samaritana. Izany no nataon'i Jesoa mampianatra atsika tsikelikely izy ary dia ambarany amintsika ny marina. Rehefa mihaona amin'i Jesoa isika ka fantantsika ny marina dia mampiova ny fiainantsika, izany no niseho tamin'ity fihaonan'i Jesoa tamin'ilay vehivavy **samaritanina ity**, nambarany an'ity vehivavy samaritana ity ny ati-panahin'ny fiainany, izany no ampiova atsika koa rehefa miaiky ny fahotantsika isika. Matoa isika tsy miova dia tsy manana fanetrentena, mbola miavonavona isika tsy manaiky hampianarin'i Jesoa isika, nampianarin'i Jesoa ilay vehivavy ka niaiky ny fahalemeny izy anatin'ny fanetrentena. Raha miaiky ny halementsika isika ary ao anatin'ny fanetrentena fa indrindra amin'izao vanimpotoanan'ny karemy izao dia miova ny fiainantsika tahaka an'ilay vehivavy samaritana, izy ihany koa no nanambara amin'ireo mpiara-belona aminy izay nandray an'i Jesoa ihany koa. Izany no antenaintsika amin'ity tanantsika ity, ny diosezintsika dia ny handray an'i Jesoa, raha mandray azy isika dia hiova ny fiainantsika, hihavao isika ka hangataka amin'I JESOA aza hoe mitoera ety aminay.

Izany tokoa ny famonjena dia i Jesoa mitoetra eto amintsika, aza gaga isika raha misy mitady hanilikilika na dia eo anivon'ny **fiangonana** **eglizy misy antsika** aza, henontsika tamin'ny Evanjely teo ireo mpianatra izay mitady hanome tsiny an'i Jesoa fa izy miresaka amin'ilay vehivavy. Voan'ny fakampanahy izy ireo fa te hitazona an'I Jesoa ho azy ireo samirery, sanatria izany fa indrindra amin'izao fiomanantsika amin'ny paka izao, aoka isika tsy hanana fakam-panahy nanan'ireo apostoly ireo, aoka isika ho vonona hizara amin'ny hafa. Ambaran'i Jesoa fa ny fototry ny fiainantsika manontolo dia hanatanteraka ny sitrapon'ny Ray, raha manatanteraka izany isika dia fantaro fa hiova ho tsara ny fiainantsika ka hanambara amin'ny hafa ary ireo hafa ireo no hanambara ampahibemaso tahaka ny nataon'izy ireo tamin'ny vehivavy : tsy noho ny filazanao intsony fa ny sofinay no nandre.

Enga anie isika tsirairay avy amin'izao fiomanantsika ny paka izao, amin'izao ADY sady DIA izao, hanaiky fa I Jesoa mpiara-belona amintsika ka samy hahatsapa isika tsirairay avy fa nandre an'I Jesoa ka izy tokoa ny mpamonjy. Raha izy no mpamonjy dia dioviny ny fontsika ka hirehidrehitra fahamarinana sy fihavanana ka amin'izay hampanjaka ny rariny sy ny hitsiny, ny fihavanana tena marina, ny fifankatiavana ka hihavao ny fiainantsika.

Enga anie isika ho "chappelle" velona tokoa tahaka an'ilay vehivavy samaritana, hanambara amin'ny mandodina ka amin'izay izy ireo dia hilaza hoe : *"Tsy noho ny filazanao intsony no inoanay fa ny tenanay no nandre, ka fantatray fa izy tokoa no Mpamonjy ny olona". Amen*

Mompera Arseveka Mgr Benjamin Ramaroson